

Menos activo pa falta di fondo


Apesar cu no ta mira Plataforma Ley di Cacho activo, e ley t'ey



ORANJESTAD - Por tuma nota cu problema di cachonan riba caya t'ey ainda, algo cu a pensa cu lo wordo solucioná un- abes cu Plataforma Ley di Cacho a keda instala. Sinembargo por nota cu poco despues di nan campaña di conscientisacion no a mira ni tende mas di e plataforma, esaki primordialmente pa falta di fondo pa cubri pa cumpli cabalmente cu e contenido di e ley. Veterinario Natalie Booi ta splica.

E plataforma ley di cacho ta algo cu tabata un iniciativa di hopi hende cu ta traha den e area di bestia en general for di cual Sra. Natalie Booi veterinario di Animal Care Clinic tambe tabata forma parti di dje. Mirando cu no ta tende nada mas di e plataforma, Bon Dia Aruba a puntra con a para cu esaki. Sra. Booi a splica cu e meta principal di e plataforma tabata pa implementa ey ley di cacho, pasobra e ley tabata t'ey pa mas o menos 3 aña caba prome cu e plataforma a wordo uni. Pero e problema tabata cu e parti di e ley cu tabata dicta cu ley por wordo implementa sola-

mente si a haci un campaña di conscientisacion di 6 luna prome cu e fecha cu e ta bay bira 'oficial'. Esey ta locual cu a haci cu tur e partnernan a uni y esey berdad a wordo logra. E di dos parti di e plataforma tabata e deseo pa ora di implementa e ley, pa e wordo ehecuta tambe.



Hende mester cumpli cu ley, autoridad mester controla

"Ta hopi bon pa bo tin un ley, mescos cu bo no mag di core den luz cora. E ley riba su mes ta bon y tin su funcion, pero e éxito di e ley ta sinta na e hecho si e ta wordo ehecuta, pues di hende ta tene nan mes na e ley. Y ora cu hendenan no

tene nan mes na e ley, cu tin un persona of instancia cu ta controla, manera polis ora cu bo pasa door di luz cora. Esaki ta haci cu si bo viola e ley bo ta core riesgo di haya un boet, tambe e riesgo di causa un accidente." Sra. Booi ta splica cu e ta hopi importante pa e wordo controla pasobra si niun hende no ta controla e ley por ta bon pero bo ta bay ripara cu tin hende lo gewoon pasa door di luz cora pasobra no tin consecuencia. Cual ta netamente e caso cu ley di cacho. "Hopi biaha ta scucha di hende cu e ley no ta traha entre otro, sinembargo e ley no tin nada di haber cu esey, hende mester respeta e ley. Ta mira claramente cu ora cu no tin consecuencia hendenan ta mas lihe pa no tene nan mes na regla. Cual ta locual ta pasando cu e ley di cacho."

Segun Sra. Booi den e prome lunanan cu el a wordo implementa, hopi hende tabata consciente di e ley y tambe e consecuencianan si bo no

tene bo mes na dje. E veterinario a bisa cu tabata tende reaccion cu tin hopi menos cacho riba caya (pasobra 80% di e cachonan riba caya, tin un doño) hendenan a busca manera pa cera nan cura pa nan cacho ta riba nan propiedad pa nan no haya boet. "Pues si tur hende tene nan mes na e ley lo tin hopi menos cacho riba caya, cu locual



cu ta mirando awo. Sinembargo door cu algun luna a pasa y no tin nada mas den media tocante e conscientisacion, e no ta bayendo mesun bon mas." El a splica cu tabatin un proyecto piloto cu a tuma luga den e bario di Noord, pero boetnan no a wordo duna manera mester a wordo duna, p'esey tin hende cu a ripara cu nada no ta sosode y ta habri nan porta bek, laga nan cacho cana riba caya, como cu nan no ta sinti cu tin consecuencia.

Ehempel di consecuencia
Poco tempo pasa tabata den noticia un caso unda cu un Chihuahua a wordo mordi y mata pa un cacho cu a sali for di su cura. E cacho a ataca e Chihuahua y a morde e doño cu tabata canando cun'e e momento y cu tabata purba di los su cacho for di e mordi di e cacho cu ataca nan. Lamentablemente e Chihuahua a fayece na e sitio. Den e caso aki e cacho cu a ataca a wordo poni pa drumi. Esaki segun Sra. Booi ta para den ley cu ora un cacho ta involvi den un caso di un mordi, pues cu el a morde un persona of un otro bestia, e mester wordo poni drumi. E ley t'ey, e tin su funcion, pero e di mes e no ta mucho efectivo sin tin un instancia pa implementa esaki. Y e otro parti di locual ta un

plan cu Plataforma Ley di Cacho a trece dilanti pa yuda solucioná e problema di cachonan riba caya y tambe contra maltrato di cacho ta door di confisca cacho. Ehempel: "Un hende ta maltrata un cacho, aviso ta drenta di dje, polis ta wak e y ta confisca e cacho. Pero unda ta bay cu e cacho aki?"

No tin placa pa continuacion

"Pues pa por duna continuacion na e ley aki ta e problema, no tin placa pa haci esaki cual ta e problema fundamental. E plan t'ey, y ami mes a traha hopi intenso den esaki, tabatin hasta un localidad banda di KIA, a bay eynan papia cu e hendenan, a considera esaki un bon area, neutral un area cu por pone un "dogpound". Den e ley tin tur e reglanan poni pa esaki, manera e cantidad di dia cu e cachonan mester keda eynan, e boet ora e hendenan bin busca e cacho, cachonan cu no wordo busca door di nan doño of esunnan cu no tin doño ta wak si nan por wordo adopta y sino, poni drumi." El a enfatisa cu pa logra esaki mester hende cu ta traha eynan, hendenan cu ta traha y mantene e luga, auto di transportacion pa e cachonan entre otro, cual nan tur ta costa placa, placa cu no tin, Sra. Booi a conclui. □